

JUECES

Nequesoreenaa Naajioneer

**Supuetana Judaacuaajinio caneno
pueya miaquejosacari na paraa**

1 ⁸Jiyacaritij, supuetana Judaacuaajinio caneno pueyari na paraa Jerusaleen tiaca tiuquitiaquiaari na miaquejosocoriquiano. Tii quijiaca taucuaca miaquejotuquiaari na nijiniaquetucujaja mueruuta puetunujua-naari. Na nuhuaji, cuno tiaca catijiatatuquiaariiri. ⁹Naa na miitiuniu nuhuajitij, nojoriiri Cananeo jiyanishano taucuaca miaquejoquiaari tii na tuhuananuhuacua quijiicani, Neegueb jiyanishano jiyajiniajuhuaj, cariiquia jiya jamatujiniano. ¹⁰Socua pacutetuquiaari miaquejonu Hebroon tiacajinia quijiaca Cananeo jiyanishano taucuacaari. Cuno Hebroon tiacaari coteenu Quiriat-arba sesaraca quijia. Naa shocojotatuquiaari cuno jiuujianaraca Hebroon tiacajinijinio camarucuaari. Nioori nojori sesaca quijia: Sesai, Ahimaan, Talmainio.

**Otoniel niquitiosaanu maaji
necorano na miaquejonuucua na
cama paraa**

¹¹Na nuhuaji, Debir tiacajinia quijiaca na paraa miaquejotuquiaarijaariuhuaj. Cuno Debir tiacaari coteenu Quiriat-seefer sesaraca quijia. ¹²Nojori

tiuquitiaaquishacarijia Debir tiaca, nojori paraa tiacani, Calebri jiyacari neyatu Acsa shiiniotaree. Naa sequeree narta Israel pueyari:

“Teyano pa maanujinijinioteja pa paraa shocotanutaniya miaquejonu na tiacajinijini, janiyari na niquitionutaniya necorano quiyatu Acsani.”

¹³Otoniel puerojosano pueya maanuu-ri nojori paraa shocotaquiaari miaquejonu cuno Debir tiacajiniji. Nio Otonielni, nojuajaari Quenaz niyanu. Quenazri Caleb tarajanu quijia, jiyareta na nuhuajishana. Naacuatej, Calebri neyatu Acsa niquitioree Otoniel. ¹⁴Acsa jaara Otonielcua tiuquiquiaari, Otonielri shiniujiurii na que na masenura jiya nojori cuhuariquiara na cuariyataja. Acsa tiuquishacari na que Calebcua, na burro nijiniji roseseeeri. Na que niquishacari nojuaja, na nequesotareeri:

—¿Casaacuateja cucua tiuquishaareeni sanaa?

¹⁵Neyatuuri na que riuquaree:

—Quiaacuajaari tari cua niquitiorucuaa Neegueb cariiquia jiya jamatu. Tii pacaretacojua na samo nacacataja cua niquitiorenoj.

Naacuatej, Calebri neyatu niquitioquiaari tuhuananuucua pacaretacojua samo nacaca, na jamatujinia pacaretacojua samo nacacajuhuaj.

**Supuetana Judaacuajinio caneno
pueya, supuetana
Benjamiincuajinio caneno pueya
miaquejosacari na paraa**

¹⁶Tariucuacaanu, Moisees niquiocua queecuajinio caneno pueyani, puetunu nojorijianaari na tiacajiniji pacuquiaari. Cuno taucuaca tiaca teje na camaruhua shiriquiaaricuajani, naa sesaraca quijiaari: “Queraatia mani quijia tiaca.” Cuno pojoriiri na tiacajiniji quiaquiaari supuetana Judaacuajinio caneno pueyata. Cariiquia Judaa jiya jamatujinia quituushiiri cuno Judaa pueya jiyajiniija. Cunoori Arad tiacajiniji pananu muetasamaji muenecaacuara. Cuno pojoriiri Quenita jyanishano taucuaca quiriquire. Naacuatej, nojoriiri tii quituushiiquiaari cuno jiyajinia quijiaca taucuacata.

¹⁷Jiyacaritij, supuetana Judaacuajinio caneno pueyari tarajanu Simeoncuajinio caneno pueya cojiquireaari na miaquejonura cuno jiyajinia quijiaca nojori paraa Cananeo taucuaca, taa tari nojori pocoojoquiaaricuajani. Naacuatej, nojoriiri Sefat tiacajinia quijia Cananeocuaca miaquejoquiaari puetunujuanaa. Nojoriiri tojetaarucujanaa niyarequetaquiaari cuno Sefat tiaca. Nojoriiri saniniuujia cuno tiaca sesojoquiaari Hormaa. ¹⁸Saniniuujia supuetana Judaacuajinio caneno pueyari maja na naata miaquejonu quiquiaari nio tiacacajinia quijiaca nojori paraa: Gaza, Ascaloon, Ecroonno. Naajuhuj, majaari nojori naata camaruuniu quiquiaari tiacaca shocua quijia jiyaca. ¹⁹Pueyasojunaari supuetana Judaacuajinio caneno pueya cojiquireaari na taanuunura cuno jiyaca tuhuananuhujiniji tii quijiaca taucuaca. Saniniuujia maja cutaraari nojori naata

quiquiaari miaquejonu cuno tuhuananuhua jamatujinia quijia nojori paraa. Cuno jiyajinijinio nojori paraa cutaraari hierrojiniji shipinijosano caballohua jayotasano rucanejotajaru jiitajaca cutara. ²⁰Moiseescuajaari tari nojori sequequiaari, nojori jaara na paraa miaquejore na tiacajiniji, Caleb cuaara niquitiosaaria Hebron tiacaraca jiya. Narta pueyari na niquitiotuquiaari. Calebri saniniuujia puereetuua jiyaconaja jiuujianaraca Anac niquiohua taanuquiaari nerano tapueyocuaca niquitiotusano jiyajiniji. ²¹Supuetana Benjamiincuajinio caneno pueya saniniuujia, nojoriiri maja na taanuutunu quiquiaari Jerusalem tiacajinia quijiaca Jebuseocuaca. Naacuatej, cuno Jebuseocuacaari quiarijia mariyataa quituuyajaa Jerusalem tiacajinia supuetana Benjamiincuajinio caneno pueyata.

**Supuetana Joseecuajinio caneno
pueya miaquejosacari Betel
tiacajinia na paraa**

²²⁻²³Naajuhuj, supuetana Joseecuajinio caneno pueyari Betel tiacajinia quijiaca na paraa tiuquitiaquiaari na miaquejosocoriquiano. Cuno tiacaari nio sesaraca coteenu quijia “Caaniuji cuhuataja.” Cuno tiaca nojori tiuquitiaaquishacarijiyojua, nojorijinijinio manujunaa jiyaramiquitiquiaari nojoriicuaji coteenuuri. Pueyasoori naa nojori naacujua puetunu nojori miishanojinijanaa.

**Narta Israel pueyara Otoniel
quishacari nojori camarnu**

3 ⁷Israel pueyaniqui, nojoriiri Pueyaso tojinu tarinitiatuquiaari. Puetunu nojori miijosanojanaari sacaraatia quijia Pueyasora. Naa Pueyaso na niyajatetunuucuatej, nojoriiri-

ri Pueyaso niti na pueyasora
 jiyatetuquiaari jeecasano casaa. Baal
 jiyanishano quijiaari cuno casaa. Juhua
 Pueyasooocaraja nocuara
 jacamatujuacaari. Naa jacamatujuaca
 Astartee jiyanishano
 casaacuarajaariuhuj. ⁸Pueyasoori
 naacua nojori juaatiajatej naa sacuaraa-
 tia mijiaca nojori quiniucua. Naacua
 socua nojori cartequiaariiri Mesopota-
 mia jiya camarnu tahue miitianura
 nojori. Cuno tahueri Cusan-risataim
 jiyanishano quijia. Nojuajaari cuno
 Israel pueya poonijiteja na pueya
 nojori quiniucua. Ocho marijiaari
 shocojoquiaari naa cuno tahue
 jiitiasacari nojori. ⁹Israel pueyari socua
 Pueyaso secojotquiaari Pueyaso
 taraajenura nojoriicua. Pueyaso taraaje-
 nuucua nojoriicua, Pueyasoori niquiri-
 yatu cuno Israel pueyano saquiriojo-
 quiaari nequesoreena quiriqiano.
 Nojuajaari Otoniel quiriqiaase, Quenaz
 niyanu. Quenazri Caleb tarajanu
 jiyareta na nuhuajishana. Naacuatej,
 Otonielri narta Israel pueyacuaji
 tacunara quiquiaari. ¹⁰Pueyaso
 Sohuanuuri Otonielcua niquiaari na
 cumaquiniuria nojuaja. Naacua narta
 Israel pueya camarnura quiquiaariiri.
 Naacuatej, Otonielri na paraca
 Cusan-risataim miaquejonuucua
 sanequiaari. Pueyasoori Otoniel
 shocotanirii cuno na paraca tahue
 miaquejonu, Cusan-risataim
 jiyanishanoni. ¹¹Naa Israel pueya
 miaquejonu nuhuaji nojori paraatej,
 nojoriiri naacua cuarenta marijia
 shocotejoquiaari panaatia juhuajaniya
 nojori quishacari cuno jiyajinia.

**Ehud quishacariuhua narta Israel
 pueya camarnura**

¹²Otoniel shaajenu nuhuaji, Israel
 pueyari socua sacuaraatia

mijioquiaariuhua Pueyaso niquiara.
 Pueyasoori naacua Moab jiyajinijinio tahue
 Egloon jiyanishano jiyatequiaari socua
 cumaacaraca na quiniuria Israel pueyajiniji.
¹³Naacuatej, cuno tahue Egloonni,
 nojuajaari narta taucuaca Amoonita,
 Amalecita masuunujuquiaari Israel pueya
 na miaquejonura. Jiyacaritij, cuno Egloonri
 Israel pueya tiuquitiaquiaari Jericoo jamatu
 maninijanaca nojori quiquiojinia. Naa
 Israel pueya shocotasaanuucuatej, puetunu
 cuno tiacajinia quiniaajanaari Egloonra
 poonijionaara quiquiaari. ¹⁴Naacuatej,
 Israel pueyari dieciocho marijia shocotejo-
 quiaari pueyaracaanu na poonijionuusacari
 cuno Moab camarnu Egloonra. ¹⁵Naa tahue
 jiitiasacari nojoritij, Israel pueyari Pueyaso
 masequiaari nojoriicua na taraajenura.
 Pueyasoori niquiriyatu nojorijinjinio
 saquiriojoquiaari nojori coonu saniriquiano.
 Nojuajaari Ehud quiquiaari, Gueraa niyanu.
 Pueyanoori muenecatu quijia. Nojuajaari
 supuetana Benjamiin niquiohuacuajinio
 quiriqiaase.

Tamonu juuca, Israel pueyari
 cumaneeca jiyarotaquiaari nojori
 jiitiana tahue Ehudcua. Cuno cumanee-
 caari cuno tahuerano Israel pueya
 reratesano quiriqiaa taa nojori
 sequesaaquiaaricujani.

**Deebora quishacari narta Israel
 pueya nequesoreena**

4 ¹Naajuhuj, Ehud jaara
 shaajequiaari, cuno Israel pueyari
 socua sacuaraatia mijionura
 coteequiaariuhua Pueyaso niquiara.
²Pueyasoori naacua nojori tarinitia-
 quiaari Canaan jiyajinia quijia tahue
 Jabiin jiyanishano nojori paracara.
 Jabiinri Hazor tiacajinia quijia Canaan
 jiyajinia. Nojuajaari Cananeocuaca
 camarnu quijia jiyacari.

⁴Jiyacaritij, Deebora jiyanishano
 maajiiri narta Israel pueya nequesoree-

na quiriquiase. Deeboraari narta pueyara Pueyaso sequesano caminiujiunia quijiajuhuaj. Neyaca sesaari Lapidot quijia.

⁶Tamonu juuca, Deeboraari Barac sequequiaari nocua na niniuria. Baracri Abinoam jiyanishano niyanu. Nojoriiri Quedes tiacajinia quijia supuetana Neftalii niquiohuacuajinio caneno pueya jiyajinia. Deeboraari naa Barac sequereequij:

—Pa supuetana Israel Pueyasoni, nojuajanaari naa quia sequeyaquij: “Quia quiaare Tabor jiyanishano tuhuananuucua. Quiocua tii rerejotese diez mil canuu. Puetunu nojorijianaa cuaara quiiria supuetana Neftaliicuajinio caneno pueya, supuetana Zabulooncuajinio caneno pueyajaajanio. ⁷Janiyajanaari niaata miaquetooriquiano taucuaca camarnu nanaca shuuniujiutianiniutianiyani. Cunoori Siisara jiyanishano, Jabiin jiyatesano nera miaquejonaa puerojonara. Janiyajanaari nojori jaatianutaniya quiocuani nojori jiyanishacari nojoriiri nia miaquejonutaniya. Nojuajaari quiocuaji cutenutaniya Quisoon jiyanishano samojinia. Nojuajaari queraatia rucuanejotajaru caballohua jayotasanoraca, nera miaquejonaa na pueyajaajanio. Janiyacuajaari nojori quia niquitionutaniyaquinioj. Niocua na miaquejorennoj.”

Pueyaso saquiriojosacari Gedeoon na paraa miaquejoriquiano

6 ¹Israel pueyari socua jiyacatequiaari sacuaraatia na mijionura Pueyaso niquiara. Pueyasoori naacua nojori jataquiaari nojori paraa juaashiquiajia. Naacuatej, Madaaan jiyajinijinio nojori paraari jiyanohua nojori miitiaquiaari. Siete marijiaari nojori

shocojoquiaari naa miitiasano pueya nojori quishacaritij. ²Naa Madaaan jiyajinijinio nojori paraa miitianuucua puera socua nojoritij, Israel pueyari tuhuananuhuacua jiuurioquiaari na jamaatiujiara. Na jamaatiujiara tuhuananuhuacua canecojua raaca jeenucuatuquiaariariuhuj. Cuno nojori jamaatiujiara raacaari pueya jiyaqi canetacojua, pueya niquiyaquishaqui. ³Quera Israel pueya cotelesacari na nataacuaca carajotanu, saa jiyacarijia nojori paraa Madaaan jiyajinijinio, Amalecita jiyanishano taucuacajaaja, tamasa pananu muetasamaji taucuacanio nojori tiuquitiaja nojori na miaquejonura. ⁴Puetunu cuno taucuacajanaari Israel pueya cuhuariquiacajinia suhuoronuquiaari juhuajaniya. Juhua na camaruhuaajaari nataacuaca miatuquiaari. Naa miatuquiaari puetunu cuno Israel pueya cuhuariquiacajanaari. Gaza tiacaacua tohuatetuquiaariiri. Israel pueyari naacua maja quenaaja na jiitiatunu quijia na miatusocoriquianotej. Nojori paraari puetunu nojori seya quioquiaari nojoririjahuaj. Cunoori borreecohua, juyaca, queraatia burrohua quijia. ⁵Israel pueya paraari puetunu nojori cuhuariquiacajanaa sesoquiaari tii nojori suhuoronuunuucua, juhuajaniya tii na seya na jiitiatunuucujahuaj. Naa macuhujatujua puetunu cuno jiyajinia cuhuariquiacajanaari. Cuno pojori jaara nijioquiaari naa cuhuariquiaa na sesonuratej, tojetaarucujanaa puetunu na seyatajanaa nijiojuaari. Cuno nojori seyari jiyanohua queraatia camellohua quijia. Muera majaari, puetunu cuhuariquiaa puetuyajanaari. ⁶Naa Madaaan jiyajinijinio nojori paraa miiniuucua Israel pueyatej, nojoriiri quera na miaajaa titiaconu. Naacua socua

Pueyaso masetuquiaariiri, Pueyaso naacunura nojori.

⁷⁻⁸Israel pueya jaara Pueyaso masetuquiaari Madaian jiyajiniinio nojori paraa Pueyaso tacunura nojoriicuai, Pueyasoori saaja nojoriicua jiyaroree pueyarano na sequesano caminiujiunia. Cuno pueyanoori naa nojori sequequiaari:

—Pa supuetana Israel Camarnu Pueyasoori naa sequeyaquij: “Janiya-cuajaari noo nia Pueyasoni, Egipto jiyajiniji nia jaatianotej. Niaacuajaari cuno jiyajinia miitiasaaquiaari nia poonitishaanuucua pueyaracaanu. ⁹Majaari saaja cuno Egipto taucuacaacuaji cua jayonu quiquianu niajaniya, janiyacuajaari puetunu nia miitijaca taucuacaacuajijanaa nia cojuanojanihuahaj. Janiyari cuno nia paraa Cananeocuaca taanuuno jacariaja niaacuaji nojori jiyacajiniini. Naacuatej, janiyari cuno nojori jiyaca niquitiojono niaarano nojori jiyaca saniniunijia. ¹⁰Janiyacuajaari tariucua naa nia sequenoni, ‘Janiyacuajaari nia Camarnu Pueyasoni. Majaari taucuaca Amorreoacuaca pueyasohua puerenu, teyano jiyacajinia nia quiyacuajanij. Niaari tariucua naa niaarano cua sequesano shocoterucuaa saaja tojetarucujanaa cua tojtiaashijiaca nia quiniuucua.’”

¹¹Jiyacaritij Pueyaso seruuri nimiaa. Ofra tiacajinia nujuaja naana cari cajishiiri. Cuno tiacaari Joas tiaca quijia na supuetana Abieezer jiyajinia. Joasari Abieezer niquiohuacuajinio muetano. Joas niyanu Gedeoonri jiyacari jiyasohuaja na trigo nooniujiuriquiaa uva rapijiojuajinia. Naa jiyasohuaja poonijoriquiaari, maja nojori paraa Madaian jiyajiniinio niquiniuria nojuaja.

¹²Pueyaso seruuri jiyacari nocua muetaquiaari. Naa na sequereeri:

—Pueyasocuaja quia cojiya, puereyaquijia cumueeca pueyanonaa.

¹³Gedeoonri Camarnu riuquaree:

—Rupaquijia cua tojiricuar, Camarnunaa. Pueyaso jaara canaata quiriqia, ¿casaara puera canaa paraa miitiaa canaacuaraarinij? ¿Teetecuar noo cumaacani canaa saaquiapue na poojotaquiaa canaatej? Najuhuaana sequesaaquiaatejuhuanaari, Pueyasona na cumaacata Egipto jiyajiniji canaa jaatiaquiaari. ¿Teetecuararinij? Maja naasucuan. Pueyasocuaja canaa carterecuaano Madaian jiyajiniinio canaa paraara. Cuno taucuacaari naacua canaa miitiaaquij.

¹⁴Camarnujuaanaari Gedeoon shootia-ree tacuriitia. Naa na sequereeri:

—¿Casaara najuhuaana cumuecatequia? Cuno quia jiitiasano cumueeca quia saniri Madaian jiyajiniinio nia paraacua. Janiyajanaacuajaari nojoriicuar quia saneejiyani.

¹⁵Gedeoonri naa na riuclarohuacuhuj:

—Quenaaja cua tojiricuaraja cua Camarnunaa. ¿Janiyatucua taa canaa miitianaa canaa paraa miaquejorecuanaanij? Canaa, supuetana Manasees niquiohuacuajinio caneno pueyaniqui, canaari tojetarucujanaa secajani. Naajuhuj, janiyari cua tapueyocacajiniji socua nojori naatujuani.

¹⁶Pueyasoori Gedeoon riuquaree:

—Quia naatacuaja quia paraa miaquejonu. Janiyacuajaari nojoriicua quia cojiriquianoni. Quiaari naacua Madaian jiyajiniinio quia paraa monutaniya tojetarucujanaa juhua niquiriyatujua.

¹⁷Gedeoonri jiyacari naa Camarnujuaanaa sequereequij:

—Quiaa jaara seetanujuaanaa cua saquiriojiya quia sequesano cua miiniuria, quiarijia cua tore. ¿Seetanu-

juanaa quiajaníyatucua niya cuata pocoojiyani? ¹⁸Jaara naa quirítij, quiaríjia cua tojirícuaraja. Maja senota níiquíj quíanuhoa janíya cuaara quia coquesuhuaatíjiaj. Ritia cua casaa nertacoora cua níquitiosocoríquiano quiajaníya.

Camarnuuri seetanujuanaa naa na sequeree:

—Janíyacua niyaja quia sashiniutianíyani.

¹⁹Gedeeonri na tiajinia quíacuhua. Na cabra níquíojuu moreeri. Ritia na capíquiuriiri. Naajuhua, veinte litro trigo cashojua shanacujureeri. Na poreetajaaju na miníquíootasano cashojua majeetejoree ritiaari. Shu capíquiucua níojoree canaasatujíniaari. Na caaca shuurií coshíjíniaari. Puetunu na patootaareejanaa naana caríríari tee na sashishaaríquiaacuajánij. ²⁰Pueyaso seruuri Gedeeon sequeree:

—Nío saajíacua quia níojore shu, cuno na poreetajaaju quia majeetejosa-no panjaajanío. Quíocua quia patasano caaca totarohua na caco.

Gedeeonri naa míiríi taa na sequesaaeecuajánij. ²¹Na nuhuají, Pueyaso seruuri na nataca nacatu rupueteree shuucua, na poreetajaaju majeetejosano pancuajaajanío. Jiyacari-tíj, cuno saajíari tama noshíquiíjiaaja. Shuuri na pantaja cateree puetunujua-naa, shaaquí tii. Naa na míiniu nuhuají-tíj, Pueyaso seruuri tíjia shaajecuhua na namíjia taquíj. ²²Gedeeonri jiyacari shusha níshíquíi nojuajaquí Pueyaso seruta pocoojoríquiaacuaja. Nojuajaari naacua naa sequereequíj:

—iJuhuej Camarnunaa!
iCamarnucuaajaquí quíríquíaa! iQuiaríjia cutara, janiyajanaa cua namíjiaata níquiríi Camarnujuanaa seruní!

²³Pueyasoori Gedeeon sequeree naatej:

—Quíoojia quia cajítiri. Maja puerenu. Maja quia shaajenu quíníutia-níya.

²⁴Gedeeonri tíjia riunitíquíari sai. Naa na jíyaníquíríohuari, “Pueyasoori jíuuja cajítíjia.” Cuno sai paatishanoori na quíníu quíyajaa Ofra tiacajínia. Cuno tiacaari Abíeezercuajínío caneno pueya jíyajínia. ²⁵Cuno níucuaajánij, Camarnujuanaari naa sequesquíari Gedeeontej:

—Quia que júyacajíníj níquíriyatú caya quia quíare, nooj, tariucua siete maríjia shocotejonotej. Cunoori socua panishano juunu tarajanu. Naa quia míiniu nuhuajítíj, quíocua cuna juunu jíyajeetaníri Baalcuaa catíjiaja saíjíníj paatishano júhuacutú, na pueyasora quia que jíyatesanóni. Quíocua júhua Aseraa níquishano quejasano naana nújuatesano nojorí secojosano pojoteterejúhuaj. Cunoori Baacuara catíjiaja shuríucua nújuaja naana. ²⁶Naa quia míiniu nuhuajítíj, quíocua cuno tuhuananujíníj saítia júhuacure tíi quia catíjiajara cucuaa quia poonítíjiosano juunu. Quíocua coteenu mojóquíi quia pojotesano júhua Aseraa níquishano naanani. Quíocua cunotaja catíjiarohua quíríia cuno juununi.

²⁷Gedeeonri jíyacari díez na jíyaraajia canuu saquíríojoree. Naa míiríi taa Pueyaso sequeree nojuacuajánij. Na camaca na puerenuucua, tama nojorí tiacajíníjío pueyajuhua, majaari cuno na míiniu quíríi juuca. Níucua na míiríi júhuajáníya cutaraari. ²⁸Jaara júhuaquequíari, cuno tiacajíníjío camaruhuari Baalcuaa catíjiaja ríuríatatuquíari jíyajeetano. Pojotesano quíríquíaaajíriuhua naanajíníj quejasano júhua Aseraa níquishano naana, Baalcuaa catíjiaja shuríucua nújuajani. Quiaríjiaaca saítia júhuacusanó níquítiuríiaaríuhua.

Juunuuri tariucua tii catijiasano quiriquiaa. ²⁹Jiyacaritij, puetunu nojorijianaari naa nequesoreetooquiaa-ri:

—¿Canateja naa miiriicuaani?

Nojori pajenuunuucua na nequesoree-nuta puetunujuanaa, socua sequesaaereeri Joaas niyanu Gedeooncuaaja naa miiriquij. Naacuatej, cuno pojoriiri Joaascua quiaquee. Naa na sequetuseeri:

³⁰—Miji canaacua quia tohuatere quia niyanu canaa mosocoriquiano. Nojuajaqui pa pueyasohuara pa jiyatesano Baalcuara pa catijiaja juhuacu jiyajeetaree. Na shuriucua nujuaja Aseraa pojotereejaaariuhuaj.

³¹Jiyacaritij, Joaasri na shocua maano narta pueya sequeree naatej:

—¿Niaateeri naa Baal miishaanuucua nocua naminiu paniya pueyano miaquenutej? ¡Tee, nia quiaarecuaaqui! Juaashoo sequeecua juaaritinijia. Teyonu nijaniyajinijinioteja naa Baal miishaanuucua juaaquioyani, nojori cuaara quiarijia miaquejosaaria pananu muetaaquishacarijia. Baal jaara seetanujuanaa Pueyaso quiri, nojuaja cuaara tama na coonujaaja namiiria canteja na pojotereecuajano.

³²Cuno juucajiniji, Gedeoonri jiyaniquishaaree “Jerobaal.” Nioori naa sequeyaquij: “Baal cuaara na coonu nujuataara, cante nocuara catijiaja jiyajeetacanucujani.”

³³Jiyacaritij, Madaian jiyajininijinio taacuaca, Amalecita jiyanishano taucuacajuahuaj, puetunu pananu muetasamaji taucuacajanaari coquetooquiaari Israel pueya na miaquejonura. Miaquetoonuucua nojori nishacari, Jordaan moo jatatumaari. Jezreel jiya jamatujinia suhuoronuuseeri. ³⁴Jiyacaritij, Pueyaso Sohuanuuri Gedeooncua

quiaaree na cumaquiniuria. Gedeoonri naacua borreeco nacaja jonenererecujua. Abieezer niquiohuacuajinio caneno narta pueyari na coquesecujua.

Gedeoonri jiyacari na jiyaraajia jiyaramiquirii puetunu narta supuetana Manaseescuajinio caneno pueyacuajanaa. Naa quijiaari Gedeoon jiyarotasano na rupaa narta pueyacia:

—Miji cuarta pueyanaa. Pa coquetoorejataj. Pa paraa pa saniri miaquejonu.

³⁵Naa jiyaramiquirii supuetana Aseercuajinio caneno narta pueyacuajaariuhuaj, supuetana Zabulooncuajinio caneno narta pueyacuajuhuaj, supuetana Neftaliicuajinio caneno narta pueyacuajinio. Naacuatej, puetunu nio narta pueyacuajinio caneno pueyajanaari Gedeooncua nijioquiaari nojuaja na cojituniuriajuahuaj.

³⁶Gedeoonri jiyacari Camarnu Pueyaso sequeree naatej:

—Quia jaara seetanujuanaa cua saquiriojoree canaa paraa cua miaquejonura cuarta Israel pueya quiniuria juhuajaniya taa quia sequeree janiyacuajani, quiarijia quiria quia miiriucuarajaj nio cua sequesano quiajaniyani. ³⁷Janiyari borreeco shoque muenutaniya carijiniani, jatij tee pueya jocuaquiaa na trigocuajani. Saaja cua miesano shoque cajaca jaara juhuaquema piquiquia riya shaaca jiasano, jiya jaara quiri jojeeca saniniuuja, janiyari naacua niishiniutianiyani quiaaqui seetanujuanaa cua saquiriojoree canaa paraa cua miaquejonura, naatej taa quia sequeree janiyacuajani.

³⁸Puetunujuanaari naa maninia Gedeoonra tohuatequiaari taa na paniriquiaacuajanj. Tariquicuaji na sanesacari, carijinia na miesano shoque

cajaca minijioreeri. Riya shaacaari niquiriyatu suhuocorau mishaja quirii. ³⁹Gedeon taacanuunuucua, socua camiriohua naa Pueyaso sequenuuriuhuj:

—Maja juaaniu Pueyasonaa, cua tequejotenuucua quiajaniya. Niojuanaa quia nequesotareeraj. Quiaritia saniniuuja, cua miesano shoque cajaca cuaara juhuaqueera joojeeca. Riya shaaca cuaara piquiojora jiya saniniuuja.

⁴⁰Cuno niucujani, Pueyasoori naa miirii Gedeonratej taa na paniriquiaacujani. Jaara juhuaquequiaari, shoque cajacaari tojetarucua-janaa joojeeca quiriquiaa. Jiyari saniniuuja piquiquia quiriquiaacujua, jiyareta riya shaaca jiasano.

Gedeon shocotasacari na paraa Madianita taucua

7 ¹Gedeonri Jerobaalta jiyaniquishaaquiarijuhuj. Noo narta pueya Gedeon cojitiuquiaari na naacuturiquiano na paraa miaquejonutej, puetunu nojorijianaari shusha juhuaquesacari quiojoma. Nojoriiri Harod jiyaniishano samo naca pacaretacojuajinia tiuquishii, tii suhuoronuuseeri. Nojori quishaquiji, pananu muetasamaji miaquetajaacuara quituriquiaari nojoritia miaquetoojoriquiano Madaan jiyajinini nio taucua. Cunoori Moree jiyaniishano jiyaconaja tuhananu pajama quiriquiase na jamatujinia.

²Pueyasoori jiyacari Gedeon sequereequij:

—Quiaaruhua puera queraatia pueya jiyataa quia paraa miaquejonuucua. Puetunu quiata quiniaa Israel pueya jaara shocotare miaquejonu Madaan jiyajinini nojori paraa, tama nojorijaaritia naa sequetunutaniyaquij:

“Tama canaajaaritia canaa paraa miaquejorucuaani.” ³Naacuatej, quiaritia quia numootere pueya, teyano nojorijininioteja miaquetoojonu puereyani, cuno pojori cuaara quiojohuara na tiajiniohua.

Gedeon numootesacari Pueyaso sequesano nojuaja, veintidos mil pueyari quiojorohua. Nojori nuhuaji cureequeri saaja diez mil. ⁴Pueyasoori Gedeon camiriohua naa sequenuhuaj:

—Juhuanajuaja puera queraraquijia cuno quiata quiniaa pueyani. Quiarijani, mohuaca ratunuucua nojori quia puetaare. Janiyari tii nojori niatanutaniyani teyano nojorijininioteja quiata quiojoriquianoni. Janiyajanaacuajaari quia sequeriquianoni teyano quia saquiriojonutaniya quia cojiriquianoni, naajuhuj teyano pojoritijia cureenutaniyani.

⁵Gedeonri mohuaca ratunuucua pueya jiyataquee. Pueyasoori jiyacari na sequere:

—Quiaritia cutara, noo pojori quia saquiriojore quia cojiriquiano na nujuanuta mohuaca tamueree na juaashiquiajiniji juhua saretej. Noo pojori saniniuuja, mohuaca na ratunura shiitiaree na mojqetacojutatej, puetunu nojorijianaa cuaara quiojohuara.

⁶Noo pojori mohuaca tamuetuquiaari na juaashiquiajiniji juhua sareyatej, nojoriiri secaja quiriquiaa, nareja tresciento. Nojori maanu saniniuuja, puetunujuanaari na ratunura mojqetacoquiaari. ⁷Pueyasoori naacua Gedeon sequereequij:

—Cuno tresciento pueyani, janiyari Madaan jiyajinini cuno nia paraa nia miaquejotenutaniyaquinioj. Niaari naacua panaatia quiniutaniya na nuhuaji. Nia maanu saniniuuja, nojori cuaara quiojohuara puetunujanaa.

⁸Jiyacaritij, Gedeoonri nojoritia quiojiyaquiriquiano narta pueya sequeree:

—Puetunu niajanijajanaa, nia suhuortucujinia nia quiojorohua.

Cuno pojori quiojiyaquishacarijia, Gedeoonri nojorijiniji nojori pataco masejoree, na jonesocoriquiano borreeco caya nacajajaajanio. Jiyacaritij, Gedeoonri cuno tresciento saquiriojosano pueyata quiriquiaa tuhuananuucua catecanaataja nojori paraa quijiajiniji. Nojori paraari cuno tuhuananu pajama qutiuriquiaa na jamatujinia.

⁹Cuno niucujajanj, Camarnu Pueyasoori naa sequeree Gedeontej:

—iQuia sanere taa quia miyanij! Jiyacarijia Madaaan jiyajinijinio quia paraa quia saniri miaquejonu. Cua cojinuucujajanaa niajanija, quiaacujaari nojori moquiriquiano. ¹⁰Quiaa jaara puerereja nojori miaquejonu, nio tuhuananuujiniji quia rosetaare quia seru Puraa. ¹¹Quiocua nojori tojishijia casaa na pocoojiyajanojoni. Na nuhuaji, quiaari jiyacari shusha nojori miaquejonu paniniutianiya cutara.

Naacuatej, Gedeoonri tuhuananuhuacoji na seru Puraata rosetaquiaari catecaji na paraa suhuortucujinia na shanacunura.

¹²Cuno jiya jamatujiniani, tii qutiuriquiaari Madaaan jiyajinijinio taucuaca, Amalecita jyanishano taucucajuhua, puetunu pananu muetasamaji quijiaca taucucajajanaano. Cuno taucuacaari cuno jiya jamatuhuoco puetunu tiqiyo-cua cucuno niquiriquiaajanaa. Juhua sequeruuri muera mariquiaa puetunu cuno jiya jamatuhuacojanaa. Naajuhua, nojoriiri queraatia camellohuaraca quiriquiaa, juhua shoniniacu caminia shuriquioco paaquiojua jaaquia. ¹³Tari Gedeoon tiuquishacari na paraa suhuortucujinia, niquiriyatu nojori

paraajinijinioori jiyacari narta soldado pohuatariquiaa na maquiyojosanojiniji. Naa na pohuatariquiaari:

—Cua maquenujinia, janiyari cebada cashojuajiniji majeetesano pan niquirii tuhuananuhuacoji pocua saqutiyanoni. Cua niquiaraja suhuortuucua cuteseeri. Suhuorotuuri titiaquee.

¹⁴Narta soldadoori na riucuaaree:

—Tuma tamonu casaa jiyaninioj.

Quiaaqui tama pocuaranojaaja maquiyojoree Gedeoon nijiniaquetucuja mueruu. Gedeoonri Joaas niyanucuja, supuetana Israel niquiohuacuajinio caneno pueyano niyanu. Nojori Pueyasooki niya quiarijia pa miaquejotenutaniya Gedeoon puetunu niya quiniaa Madaaan jiyajinijinio pajaniyajanaa.

¹⁵Naa Gedeoon tojinuucua cuno tahue pohuatasano na maquenujinia na niquishanotej, naajuhuaq tama nojorijiaarjia na niishirijuhuaq casaara naa na maquiyojoreenij. Gedeoonri naacua Pueyaso maniniuhuaqueetaree jyanohua na timiniutia. Gedeoonri tiji quiacuhua ritia, jatij narta Israel pueyacuohuatej. Naa nojori sequesuhuari:

—iNia sanetare! iPueyasocuja quiarijia Madaaan jiyajinijinio pa paraa pa miaquejotenutaniya!

¹⁶Gedeoonri jiyacarijia ritia cuno na jiitiasano tresciento pueya raquiriojotaree jiuujianaraca maanura. Puetunu nojorijianaa serotaree borreeco nacajaari, patacucujajaajanio mii na niojotatujuara tariucua noshitijosano samari. ¹⁷Gedeoonri naa nojori sequereejuhuaq:

—Janiya jaara pa paraa quijia taquijiria tari quishiicuaani, niocua cua niquirijia taa cua miiniutianiyacuaanij. Niocua juhua cua miniu miirijuhuaq.

¹⁸Janiya jaara cuata quiniaata borreeco

nacaja jonenerecuaani, niocua puetunu pa paraa shocua nia nujuatusaquiji nia muetujusano borreeco nacaja jonenenuurejuhuaj. Niocua jiyacari naa jiyanohua nia rupaa paaretarejuhuaj. Niocua naa sequere: “iNioori Pueyasora, Gedeonranio!”

¹⁹Tari cuno na cien pueyata Gedeon quishacari nojori paraa quijia taquijiria, nojori paraari jiyacari tari quera sanitiriquiaa noo pojori, maquetiuyano nujuanunaatej. Jiyacariiri tari shiyaqueya quiriquiaa. Jiyacaritij, nojoriiri na borreeco nacaja jonenenuuree. Na pootusano patacucia cocuasetureejaariuhuaj.

²⁰Naacuatej, cuno jiuujianaraca pueya maanuuri nojori nujuatusaquiji mariyataa jatiqui jonenenuuree nojori borreeco nacaja. Jiyacari na pootusano patacucia cocuasetureejaariuhuaj. Puetunu nojorijianaari na muenecaacuara patootariquiaa noshiquioyano samari, na jonenenuusano borreeco nacaja na miaquetajaacuara saniniuujia. Jiyacaritij puetunu nojorijianaari mariyataa jatiqui na paraa jaacataturree naatej:

—iPa miaquejore! iNioori Pueyasora, Gedeonranio!

²¹Israel pueyari na nujuatusaquijia tariniquioquiaari socua. Saniniuujia, cuno Madaian jiyajinijinio soldadohuari nucuatuquiaari. Ninishiqui sariyocuaturreeri. Na mashiyocuatunura netecuaturreejaariuhuaj. ²²Cuno tresciento canuuri na borreeco nacajaa jonenenuunu tarnitiaaquiquiaari. Pueyasoori jiyacari cuno Madaian jiyajinijinio taucuaca tacaresetanirii. Tama nojorijaarijia puecotooreequiaa. Nojori maanuuri socua mashiyocuatuaquiaari Bet-sitaa tiacajiniara. Cunoori Sereraa tiacajiniara neteja nucuama. Noojiaqueyari naa tiuquijijiotuseejuhuaj Abel-meholaa jiyanishano jiyajinia. Cunoori Tabat tiaca shuriucua.

²³Jiyacaritij, Israel pueyari nio narta pueya numootejoquiaari: supuetana Neftaliicuaajinio caneno pueya, supuetana Asercuaajinio caneno pueyajuhuaj, supuetana Manaseescuaajinio caneno pueyano. Puetunu nio pojorijianaari mashiyocuatuno Madiian jiyajinijinio nojori paraa neteyotaturee. ²⁴Gedeon saniniuujia, nojuajaari supuetana Efraincuajinio caneno pueyaca ritia jiyaramiquiaari na pueya. Nojori tuhuananuhuacua jiyacaraca quijia. Nioori nojoriria Gedeon sequesano quiquiaari:

—Cuarta pueyanaa, pa paraa cunocohuate, Jordaan moo jatajajinia nocuaji nia cutesee. Niocua nocuaji cutere Bet-baraa jiyanishanojinia. Cunoori Jordaan moo quejoocuajajinia.

Naacuatej, supuetana Efraincuajinio caneno pueyari naa Gedeon sequesano miituquiaari. ²⁵Naacuatej nojoriiri Madaian jiyajinijinio querajaa nojori paraa camamu quiooree. Cuno querajaa tahueri Oreb jiyanishano quiriquiase, Zeeb jiyanishanojaajanio. Naa nojori paraa na quiootunu nuhuajitij, cuno Oreb jiyanishano motuquiaari puereetuca saajiaacuara. Cuno saajiaari naacua naa na sesaatiajaaquij, Oreb saajia. Nartucuaa jaarajaaja Zeeb jiyanishanoni, nojuajaari vinorano uva rapijiojuajinia mosaaquiaarijuhuaj. Na mosaquiiri naa na sesaatiaajuhuaj, Zeeb. Naa supuetana Efraincuajinio caneno pueya miaquejonu nuhuaji na paraatej, nojoriiri Oreb, Zeeb naca pooquiaarihuacua Gedeoncu. Gedeonri jiyacari nojoriicuaaji quiriquiaa Jordaan moo taquijirajaaja.

Gedeon nequesoreesacari panaatia narta Israel pueya

8 ²⁸Naa Israel pueya miaquejonuucua cuno nojori paraa Madaian jiyajinijinio taucuacatej, naacuatej Gedeonri nojori jiyatequiaari na sequesano

tojijiaa cuno taucuaca quiniuria. Naa Madaaan taucuaca shocotasaanuucuatej, majaari quenaaja na miaquetoojonu quiquiaari socua Israel pueyata. Cuno nuhuaji, cuarenta marijaari shocojo-quiaari Gedeon rishishacarijia. Jiyacaritij miaquetoojonuuri turetaquiaaricaraja quenaaja. Panaatia qutiujiaari.

**Tolaa jiyanishano quishacari narta
Israel pueya nequesoreena**

10 ¹Abimeelec nuhuaji, supuetana Isacar niquiohuacuajinio caneno pueyanoori narta Israel pueya nequesoreenara quiquiaari. Nojuajaari Tolaa jiyanishano quijia. Tolaari Puua jiyanishano niyanu quiriquiase. Cuno Puuaari Dodo jiyanishano niyanu. Jiyacaritij, Tolaari narta Israel pueyacuaji tacuriquiano nojori nequesoreenara quiquiaari. Tolaari Samir jiyanishano tiacajinia quijia. Cunoori supuetana Efraiin niquiohuacuajinio caneno pueya jiya tuhuananuhajinia tiaca. ²Nojuajaari veintitres marijia shocotejoquiaari narta Israel pueya nequesoreena na quishacari. Na nuhuaji Tolaari shaajequiaari. Samir tiacajinia jamosaquiaariiri.

**Jair jiyanishano quishacari narta
Israel pueya nequesoreena**

³Cuno nuhuaji, Jair jiyanishanoori Israel pueya nequesoreena quiquiaari. Nojuajaari Galaad jiyajinijinio quiriquiase.

⁵Jair jaara shaajequiaari, Camoon tiacajinia jamosaquiaariiri.

**Israel pueya saniitosacari
sacuraatia nojori miiniuucua**

⁶Jiyacaritij, Israel pueyari saaja sesa miiniu coteequiaarihua Pueyasora. Nojoriiri Pueyasojuanaa cartetquiaari

jeecojosano pueyasohua tojitiajaca nojori quiniuria. Cuno, Israel pueya panishano pueyasoori juhua Baal niquishano quijia, juhua Astartee niquishanonio. Naajuhuj, nojoriiri nio taucuaca jiyacajiniji pueyasohua jiyanishano tojitiajaca quiquiaarijuhuaj: Siria, Sidoon, Moab, Amoon, Filisteocuaca pueyasonio. Israel pueyari naa Pueyasojuanaa cartetquiaari pueyasojanishoosequeecuaratej. Nojoriiri maja tari na catijiatunu quijia na seya Pueyasooacara. ⁷Pueyasoori naacua nojori juaatiaquiaari jiyanhuatej. Cunora nojori tarinitiareeri nojori paraa Filisteocuaca, Amonitacuacajuhuj cuaara naquiya miitiaara nojori. ⁸Naacua nojori saniiniuria quenaajatej, nojori paraa Filisteocuaca, Amoonita jiyanishanonio, nojoriiri na jiuujiayaquiniutia dieciocho marijia miitiaquiaari puetunu nooj Israel pueyajanaa Galaad jiyajinia quijiacatej. Cunoori pananu muetasamaji Jordaán moo taquijiria quiriquiase, Amorreocuaca jiyajinia. ⁹Naajuhuj, Israel pueya paraa Amonita jiyanishano taucuacani, nojoriiri pananu muetasamaji nijioquiaari. Jordaán moo jatatumaari pananu cariquicora quijiaa Israel pueya na miaquejonura. Cuno Israel pueyani, nojoriiri supuetana Judaa niquiohuacuajinio caneno pueya quiriquiase, supuetana Benjamín niquiohuacuajinio caneno pueyajuhuj, supuetana Efraiin niquiohuacuajinio caneno pueyajaajanio. Naa na paraa nijionuucua nojoriicuatej, puetunu cuno Israel pueyajanaari jiyanhua tacaquiquiaari, miaquejosaanu na pueretusacari. ¹⁰Naacuatej, Israel pueyari shusha jiyacariquiya Pueyasomaseturee na naacunura nojori. Naa sequeturee Pueyasoori: “Canaa Pueyasoraa, canaa sesa quia miiriucuaani ni

canaa cartenuucua quiajaniya. Canaari quia shocoterucuaani canaa secojonuunuucua tama canaa jeecojosano pueyasohuarajaaja canaa jiyatesano, nooj pueyasohua jiyosequetej.”

**Jeftee nuhuaji Ibzaan jiyanishano
quishacari narta pueya
nequesoreena**

12 ⁸Narta Israel pueya nequesoreena Jeftee quiniu nuhuaji, nojoriiri tamonu jiyatequiaari nojori nequesoreenara. Na sesaari Ibzaan quijia, Beleen tiacajinijinio narta pueyano.

**Eloonri nequesoreenara
quiaquiaari Ibzaan niti**

¹¹Cuno Ibzaan nuhuaji, Israel pueya nequesoreena quiquiaariaariuhuj Eloon jiyanishano. Nojuajaari supuetana Zabuloon niquiohuacuajinio muetano quiriquire. Naa narta Israel pueya nequesoreena na quishacaritij, diez marijiaari na shocojoquiaari.

**Ibzaan nuhuaji Abdoonri
nequesoreenara jiyatesaaquiaari**

¹³Na nuhuaji, Israel pueyari socua tamonu narta pueyajinijinio nojori

nequesoreenara jiyatetuquiaari. Nojuajaari Abdoon jiyanishano quiriquire, Hilel niyanu, Piratoon tiacajinijinio. Nojuajaari ocho marijia shocotejoquiaari narta Israel pueya nequesoreena na quishacari. ¹⁴Abdoonri cuarenta niquiohuaraca quiriquire jiyacari, treinta jiuhuanio.

**Pueyasoori Israel pueya shocoteja
socua sesa miiniu nojori
pacutenuucua**

13 ¹Puetunu cuno Israel pueyajanaanij, puetunu nojorijianaari socua sesa miiniu pacutequiaari Pueyaso niquiara. Pueyasoori naacua nojori shocotequiaari. Naacuatej nojori paraa Filisteocuacaari socua nojoriicua jiyacatequiaari nojori na miitianura. Cuarenta marijiaari shocojoquiaari naa miitiasano nojori quishacaritij.

**Jiyacaritij Israel pueyari saaja
nequesoreenaa jiitiatujua**

21 ²⁵Jiyacaritij, Israel pueyari juhuanojuaja maja tama nojori camarnujaaja na jiitiatunu quijia. Naacuatej puetunu nojorijianaari tama na panishanojaaja mijiaca quijia.